

Na osnovu člana 18. Zakona o udruženjima i fondacijama Federacije BiH („Sl. novine Federacije BiH“ broj 45/02) te člana 42. i 68. Statuta pčelarskog društva „Nektar“, Skupština udruženja na sjednici od 16.02.2013. godine donosi:

## **S T A T U T**

### **PČELARSKOG DRUŠTVA „NEKTAR”**

#### **I – OPŠTE ODREDBE**

##### **Član 1.**

Pčelarsko društvo „Nektar” je udruženje građana koji su se dobrovoljno i slobodno udružili radi uzgoja i zaštite kvalitetnih rasa pčela, razvoja i unapređenja pčelarstva kao i ostvarivanja drugih aktivnosti, potreba i interesa u oblasti pčelarstva.

##### **Član 2.**

Pčelarsko Društvo ima svojstvo pravnog lica.

##### **Član 3.**

Pčelarsko društvo „Nektar“ osnovano je prvi puta 1897.godine i ima, uz manje prekide, kontinuitet u svom radu.

##### **Član 4.**

Pčelarsko Društvo se udružuje u Udruženje građana, Savez pčelarskih društava Tuzlanskog kantona, a može se udruživati i u druge oblike udruživanja, u skladu sa zakonom i ovim Statutom.

## **II – NAZIV, SJEDIŠTE, PODRUČJE DJELOVANJA, ZNAK, PEČAT I ŠTAMBILJ PČELARSKOG DRUŠTVA**

### **Član 5.**

Naziv pčelarskog društva je:

PČELARSKO DRUŠTVO „NEKTAR“

( U daljem tekstu: Društvo)

### **Član 6.**

Sjedište Društva je u Tuzli, ulica Ludvika Kube br. 7.

### **Član 7.**

Društvo djeluje na području opštine Tuzla.

### **Član 8.**

Pčelarsko Društvo ima svoj znak. Znak Društva je grafički stiliziran znak u obliku šestougla koji predstavlja ćeliju za polaganje ličinke, sa likom pčele u njegovoj sredini. Znak Društva ističe se uz naziv Društva.

### **Član 9.**

Društvo ima svoj pečat i štambilj. Pečat pčelarskog Društva je okruglog oblika, prečnika 30 mm, sa ispisanim nazivom, sjedištem i znakom Društva u sredini pečata, sa dva koncentrična kruga po rubu pečata.

## **III – DJELATNOST PČELARSKOG DRUŠTVA I NJEGOVO ZASTUPANJE I PREDSTAVLJANJE**

### **Član 10.**

Djelatnost pčelarskog Društva je:

- Zaštita i uzgoj kvalitetnih rasa pčela uz upotrebu savremenih tehnologija, opreme i repromaterijala,
- Obezbjedenje pčelarskog alata, repromaterijala i zaštitnih sredstava za suzbijanje i liječenje pčela od raznih bolesti,
- Savremeno korišćenje i upotreba pčelinjih proizvoda,
- Organizovanje i sprovođenje propagande i informativne aktivnosti o pčelarstvu i pčelinjim proizvodima,
- Organizovanje i praćenje kooperativnih odnosa članova Društva,
- Organizovanje i unapređenje stručnog usavršavanja članova Društva u oblasti pčelarstva,
- Organizovanje pčelarskih susreta, izložbi i drugih manifestacija u oblasti pčelarstva,
- Iniciranje sadnje medonosnog bilja i drveća u cilju akcije zaštite prirodne čovjekove sredine.
- 

#### **Član 11.**

Pčelarsko društvo može u okviru svoje djelatnosti i programskih ciljeva osnivati subjekte za privrednu i drugu djelatnost, pod uslovima utvrđenim zakonom i ovim Statutom.

#### **Član 12.**

Pčelarsko društvo može osnivati subjekte za privrednu i drugu djelatnost ako će se njihovim osnivanjem doprinijeti efikasnijem obavljanju djelatnosti i ostvarivanju programskih ciljeva društva ili ako je to ekonomski svrsishodno radi sticanja potrebnih sredstava za njegov rad i razvoj pčelarstva.

Odluku o osnivanju subjekta iz prethodnog stava donosi Skupština društva, na prijedlog Predsjedništva društva, uz prethodno sačinjen elaborat o njegovom osnivanju.

#### **Član 13.**

Pčelarsko društvo zastupa i predstavlja predsjednik predsjedništva, dopredsjednik predsjedništva i sekretar društva.

## **IV – SVRHA I PROGRAMSKI CILJEVI PČELARSKOG DRUŠTVA**

### **Član 14.**

Svrha i programski ciljevi pčelarskog Društva su da:

- Dugoročno čuva i štiti kvalitetne rase pčela
- Unapređuje i razvija pčelarstvo na osnovama savremenih dostignuća nauke u oblasti pčelarstva
- Propagira korisnost upotrebe pčelinjih proizvoda
- 

### **Član 15.**

Radi ostvarivanja programskih ciljeva iz prethodnog člana Društvo će posebno u svojim zadacima predviđati slijedeće mjere:

- Omasovljavanje pčelarskog Društva,
- Učlanjivanje mladih pčelara,
- Međusobno ispomaganje pčelara,
- Pomoć pčelarima u susjednim opštinama,
- Pomoć članovima i prijateljima pčelarstva u sticanju znanja za savremene načine pčelarenja,
- Širenje kruga prijatelja pčelarstva među građanima a naročito omladinom,
- Pomoć u osnivanju primjernih pčelinjaka kao zaokružene ekonomsko proizvodne cjeline,
- Sadnja medonosnog bilja i drveća i cilju poboljšanja pčelinje pašne,
- Razvijanje selekcije u razvoju pčelinjih društava i pčelinjeg fonda,
- Nabavka pčelarskog pribora, repromaterijala za pčelare, kao i lijekova protiv pčelinjih bolesti i parazita,
- Organizovanje pčelarskih kurseva, tečajeva i predavanja u svrhu obuke pčelara,

- Preduzimanje mjera na suzbijanju pčelinjih bolesti i zaštiti pčela od štetočina,
- Edukacija primjernih pčelara na specijalizacijama u zemlji i inostranstvu,
- Saradnja i udruživanje sa drugim pčelarskim udruženjima, naučnim institucijama, privrednim organizacijama, odgovarajućim organima u opštini i kantonu, sve u cilju razvoja pčelarstva,
- Saradnja sa asocijacijama pčelara u BiH, drugim srodnim savezima, kao sa svjetskom pčelarskom asocijacijom,
- Učešće u razvijanju naučnih institucija čiji će cilj biti razvoj pčelarstva u BiH,
- Informativno propagiranje pčelarstva.

## **V – ORGANIZACIJA RADA PČELARSKOG DRUŠTVA**

### **Član 16.**

Pčelarsko društvo ostvaruje svoje zadatke , odnosno obavlja svoju djelatnost preko svojih članova i organa pčelarskog Društva.

### **Član 17.**

Organi pčelarskog Društva vrše poslove u okviru djelokruga utvrđenog ovim Statutom i drugim opštim aktima pčelarskog Društva.

### **Član 18.**

Rad pčelarskog Društva može se organizovati po pčelarskim sekcijama i drugim organizacionim jedinicama.

Odluku o organizovanju pčelarskih sekcija i drugih organizacionih oblika pčelarskog Društva donosi Skupština na prijedlog Predsjedništva društva.

### **Član 19.**

Administrativno-stručne poslove za potrebe Društva i njegovih organa obavlja tehnički sekretar Društva.

Tehničkog sekretara postavlja i razrješava Predsjedništvo društva.

### **Član 20.**

Unutrašnja organizacija i rad pčelarskog Društva bliže se uređuje posebnim aktom Predsjedništva društva.

## **VI – USLOVI I NAČIN UČLANJENJA I PRESTANAK ČLANSTVA U DRUŠTVU**

### **Član 21.**

Članom pčelarskog društva može postati svaki građanin Federacije BiH koji prihvata prava, obaveze i odgovornosti utvrđene ovim Statutom.

### **Član 22.**

Prijem u članstvo pčelarskog Društva vrši se na lični zahtjev građanina , koji potpiše pristupnicu u pismenoj formi.

### **Član 23.**

O prijemu u članstvo pčelarskog Društva odlučuje Predsjedništvo društva.

Protiv ove odluke Predsjedništva građanin ima pravo žalbe Skupštini Društva u roku od 15 dana od prijema odluke.

Odluka Skupštine je konačna.

### **Član 24.**

Pčelarsko Društvo je dužno da vodi evidenciju svojih članova na način utvrđen važećim propisima i opštim aktima Društva.

## **Član 25.**

Članovi Društva dobijaju pčelarsku knjižicu , čiji oblik i način izdavanja utvrđuje Predsjedništvo društva.

Ovjera članskih knjižica vrši se od strane pčelarskog Društva po uplati članarine, svake godine.

## **Član 26.**

Članstvo u pčelarskom Društvu prestaje:

1. Prestankom rada Društva
2. Istupanjem iz Društva po vlastitoj želji
3. Neizvršavanjem na vrijeme novčanih obaveza prema Društvu
4. Isključenjem iz članstva odlukom predsjedništva, kada utvrdi da se član ogriješio o odredbe Statuta udruženja.
5. Odlaskom na izdržavanje kazne zatvora u trajanju dužem od šest mjeseci
6. Ako se utvrdi da je građanin bio primljen u Društvo na osnovu lažnih odnosno neistinitih podataka.
7. Kada svojim neprimjerenim ponašanjem narušava ugled Društva i pojedinih članova Društva.
8. Smrću člana.

## **VII – PRAVA, DUŽNOSTI I ODGOVORNOSTI ČLANOVA DRUŠTVA**

### **Član 27.**

Članovi pčelarskog Društva imaju pravo , obaveze i odgovornosti utvrđene zakonom, Statutom i drugim opštim aktima društva.

## **Član 28.**

Članovima pčelarskog Društva može se dodijeliti zvanje zaslužnog i počasnog člana.

Uslovi, postupak i način proglašavanja zaslužnih i počasnih članova kao i njihova prava i dužnosti utvrđuju se opštim aktom Društva.

## **Član 29.**

Pomažući članovi pčelarskog Društva su ona fizička i pravna lica koja se ne bave aktivno pčelarstvom ali koja vole pčelarstvo i žele da ga na određen način pomažu.

## **Član 30.**

Prava članova pčelarskog društva su:

1. Da neposredno upravljaju Društvom kao i da biraju i budu birani u organe Društva i da učestvuju u njihovom radu,
2. Da se bave pčelarstvom i koriste pčelinje proizvode, pod uslovom određenim zakonom i opštim aktima Društva,
3. Da koriste sve pogodnosti i prednosti koje proizlaze iz članstva u Društvu,
4. Da ostvaruju druga prava utvrđena ovim Statutom i drugim opštim aktima Društva.

## **Član 31.**

Dužnosti članova pčelarskog Društva su:

1. Da aktivno učestvuju u radu društva, u izvršavanju njegovih ciljeva i zadataka i sprovođenju akata organa Društva,
2. Da se dosljedno pridržavaju odredaba ovog Statuta i drugih akata organa Društva,
3. Da čuvaju, štite i uzgajaju pčele,



4. Da uredno i na vrijeme plaćaju članarinu i ispunjavaju druge novčane obaveze prema Društvu,
5. Da stalno rade na svom stručnom osposobljavanju i usavršavanju iz oblasti pčelarstva,
6. Da poštuju i uvažavaju druge pčelare, preferiraju uzuse kodeksa lijepog ponašanja i pozitivne, zdrave atmosfere u odnosima među članovima Društva,
7. Da obavljaju i druge dužnosti utvrđene zakonom, ovim Statutom i drugim aktima Društva.

### **Član 32.**

Članovi pčelarskog Društva odgovaraju disciplinski za učinjene povrede svojih dužnosti, u slučajevima i pod uslovima utvrđenim ovim Statutom i drugim opštim aktima Društva.

### **Član 33.**

Za povrede svojih dužnosti članovima Društva izriču se disciplinske mjere utvrđene opštim aktom.

### **Član 34.**

Ako članstvo prestaje na osnovu odluke predsjedništva, odluka se unosi u zapisnik sjednice na kojoj se donosi odluka a jedan primjerak odluke dostavlja se isključenom članu.

## **VIII – UPRAVLJANJE DRUŠTVOM**

### **Član 35.**

Pčelarskim društvom upravljaju članovi Društva neposredno i posredno preko svojih predstavnika izabranih u Predsjedništvo društva.

## **Član 36.**

Organi upravljanja pčelarskog društva „Nektar“ su:

- Skupština društva
- Predsjedništvo društva
- Nadzorni odbor društva

## **Skupština pčelarskog Društva**

## **Član 37.**

Skupština pčelarskog društva je najviši upravni organ Društva.

## **Član 38.**

Članovi Skupštine su svi članovi pčelarskog društva.

## **Član 39.**

Redovna sjednica Skupštine održava se jednom godišnje.

Prema potrebi može se zakazati i vanredna sjednica Skupštine.

Vanredna sjednica Skupštine zakazuje se na prijedlog Predsjedništva društva ili najmanje 1/3 članova udruženja.

## **Član 40.**

Sjednice Skupštine saziva i njima predsjedava Radno predsjedništvo koje sačinjavaju predsjednik i dva člana. Radno predsjedništvo bira Skupština iz reda svojih članova.

Mandat članova Radnog predsjedništva traje dvije godine.

## **Član 41.**

Skupština može punovažno da radi i odlučuje ako Skupštini prisustvuje nadpolovična većina članova društva. Ako iz bilo kojih razloga Skupštini ne prisustvuje nadpolovična većina članova, početak rada skupštine se odlaže

za 15 minuta u odnosu na zakazano vrijeme, nakon čega Skupština može nastaviti normalan rad. U ovakvim situacijama odluke Skupštine se donose velikom većinom prisutnih članova.

Odluke Skupštine su konačne.

#### **Član 42.**

Skupština pčelarskog Društva raspravlja i odlučuje o svim bitnim pitanjima koja se odnose na rad i uređenje odnosa u Društvu, kao i na razvoj i unapređenje pčelarstva a naročito:

1. Odlučuje o udruživanju, saradnji sa drugim društvima i finansiranju zajedničkih potreba u oblasti pčelarstva,
2. Donosi Statut i druge opšte akte Društva čije donošenje je u njenoj nadležnosti,
3. Utvrđuje politiku razvoja i unapređenja pčelarstva i donosi programe razvoja i rada društva,
4. Donosi finansijski plan i završni račun Društva,
5. Bira i razrješava članove Radnog predsjedništva Skupštine, Predsjedništva društva, i druge organe i radna tijela, kao i predstavnike društva u druge organizacije,
6. Raspravlja i odlučuje o izvještajima o radu Predsjedništva društva i drugih organa i tijela koje bira,
7. Odlučuje o žalbama protiv Predsjedništva,
8. Odlučuje o proglašavanju zaslužnih i počasnih članova, uskladu sa opštim aktom,
9. Odlučuje o prestanku rada Društva,
10. Razmatra i druga pitanja od značaja za ostvarivanje zadataka društva, akoja su joj stavljena u nadležnost zakonom, ovim Statutom kao i drugim opštim aktima.

#### **Član 43.**

Bliže odredbe o radu Skupštine društva uređuju se poslovníkom.

## **Predsjedništvo pčelarskog Društva**

### **Član 44.**

Predsjedništvo pčelarskog Društva je upravni organ Društva kojeg bira Skupština iz redova svojih članova.

Mandat članova Predsjedništva traje četiri godine. Svaki član Predsjedništva može biti biran više puta.

Predsjedništvo istovremeno vrši funkciju Izvršnog organa Skupštine.

### **Član 45.**

Predsjedništvo pčelarskog Društva ima ukupno sedam članova i to: predsjednika, dopredsjednika i pet člana.

Predsjedništvo, iz reda svojih članova, bira predsjednika i dopredsjednika Predsjedništva. Mandat izabranog predsjednika i dopredsjednika traje dvije godine i može se produžiti. Ako Predsjedništvo ocijeni potrebnim može predsjednika smijeniti i prije isteka mandata. Mandat Predsjednika ne može trajati duže od njegovog mandata u Predsjedništvu.

### **Član 46.**

Predsjednik Predsjedništva predstavlja i zastupa pčelarsko Društvo pred drugim organima i trećim licima.

Dopredsjednik vrši dužnost Predsjednika u njegovoj odsutnosti.

### **Član 47.**

Predsjednik predsjedništva priprema sjednice Predsjedništva i predsjedava sjednicama.

### **Član 48.**

Predsjedništvo radi kolektivno i donosi odluke i zaključke na sjednicama.

Sjednici predsjedništva prisustvuje i sekretar pčelarskog društva bez prava odlučivanja.

Predsjedništvo može održati sjednicu ako sjednici prisustvuje više od polovine ukupnog broja njegovih članova, a odluke se donose većinom glasova prisutnih članova.

#### **Član 49.**

Predsjedništvo vrši naročito slijedeće poslove:

1. Stara se o izvršenju odluka i zaključaka Skupštine društva,
2. Prati osvarivanje programa razvoja i planova rada društva i preuzima mjere za njihovo ostvarivanje,
3. Utvrđuje prijedlog završnog računa i finansijskog plana društva,
4. Utvrđuje prijedlog statuta i drugih opštih akata koje donosi Skupština društva.
5. Donosi opšti akt o unutrašnjoj organizaciji društva,
6. Donosi opšti akt o finansijsko-materijalnom poslovanju društva kao i druge akte čije donošenje je u nadležnosti predsjedništva,
7. Odlučuje o prijemu novih članova u društvo,
8. Odlučuje o utrošku finansijskih sredstava prema namjeni i dinamici utvrđenoj finansijskim planom društva,
9. Odlučuje o žalbama u disciplinskom postupku,
10. Vrši proglašavanje zaslužnih i počasnih članova društva,
11. Postavlja i razrješava tehničkog sekretara društva,
12. Imenuje svoja pomoćna radna tijela (komisije),
13. Odlučuje o službenim putovanjima i donosi odluku o putnim dnevnica i drugim troškovima službenog putovanja,
14. Donosi poslovnik o radu,
15. Obavlja i druge poslove utvrđene ovim Statutom, drugim aktima i odlukama Skupštine društva.

## **Član 50.**

Za obavljanje određenih pripremnih i izvršnih poslova, kao i radi proučavanja pojedinih pitanja i pripremanja prijedloga za njihovo rješavanje Predsjedništvo obrazuje stalne i povremene komisije ili radne grupe kao svoja pomoćna tijela.

Za administrativno-financijske i stručne poslove Predsjedništvo može angažovati i stručno lice uz ugovorenu naknadu.

## **Nadzorni odbor**

### **Član 51.**

Nadzorni odbor se sastoji od predsjednika, dva člana i dva zamjenika člana.

### **Član 52.**

Nadzorni odbor u prvom redu vodi računa o materijalnom i finansijskom poslovanju, te u slučaju potrebe poduzima mjere da se zaštite interesi pčelarskog društva.

### **Član 53.**

Nadzorni odbor je dužan da pregleda materijalno i finansijsko poslovanje po završetku godine i da o tome podnese svoj izvještaj Skupštini.

### **Član 54.**

Upravni organi i drugi organi i članovi tih organa u Društvu dužni su da vrše svoje dužnosti, odnosno ovlaštenja, na osnovu i u okviru zakona, ovog Statuta i drugih opštih akata Društva.

### **Član 55.**

Svaki izabrani nosilac upravne, izvršne ili pojedinačne (inokosne) funkcije u društvu lično je odgovoran za njeno pravilno i savjesno vršenje.

Svaki član kolektivnog organa društva lično je odgovoran za svoj rad i u skladu sa svojim pravima i dužnostima za rad i odluke organa.

## **Član 56.**

Za nesavjesno vršenje svojih upravnih, izvršnih ili inokosnih funkcija članovi upravnih organa , izvršnih organa i nosioci inokosnih funkcija mogu biti opozvani i prije isteka njihovog mandata, po postupku i na način utvrđen za njihov izbor.

## **Član 57.**

Bliže odredbe o odgovornosti organa društva i njihovom opozivu uređuju se posebnim opštim aktom.

## **IX – SREDSTVA PČELARSKOG DRUŠTVA**

### **Član 58.**

Pčelarsko društvo stiče sredstva od:

- Upisnine i članarine
- Priloga i poklona
- Dobiti preduzeća čiji je vlasnik-osnivač pčelarsko Društvo
- Drugih izvora, u skladu sa zakonom
- 

### **Član 59.**

Visina prihoda i rashoda društva, njihov raspored po osnovnim namjenama kao i ovlaštenja Skupštine i Predsjedništva u njihovom raspolaganju i korištenju određuje se finansijskim planom.

### **Član 60.**

Pčelarsko društvo vodi poslovne knjige i sastavlja i sastavlja finansijske izvještaje prema propisima Federacije BiH i Tuzlanskog kantona.

Za zakonito vođenje poslovnih knjiga i sastavljanje finansijskih izvještaja odgovoran je predsjednik predsjedništva Društva.

### **Član 61.**

Naredbodavac za korištenje novčanih sredstava društva je predsjednik predsjedništva, a u njegovoj odsutnosti druga ovlaštena lica.

## **X – JAVNOST RADA DRUŠTVA**

### **Član 62.**

Rad pčelarskog društva je javan i dostupan uvidu njegovih članova, državnim organima, Savezu pčelarskih društava, sredstvima javnog informisanja građana.

### **Član 63.**

Pčelarsko društvo obavještava javnost o svom radu putem štampe i drugih sredstava informisanja i na drugi podesan način.

### **Član 64.**

Predstavnici štampe i drugih sredstava javnog informisanja mogu prisustvovati sjednicama skupštine i drugih organa društva kao i na drugi pogodan način ostvariti uvid u rad društva.

## **XI – PRESTANAK RADA DRUŠTVA**

### **Član 65.**

Pčelarsko Društvo prestaje sa radom kada se broj članova smanji ispod zakonskog minimuma koji je potreban za osnivanje udruženja građana.

Pčelarsko Društvo može prestati sa radom pod uslovima i na način utvrđen zakonom i ovim statutom.



## **Član 66.**

Pčelarsko društvo prestaje sa radom i kada Skupština donese odluku o prestanku njegovog rada. Odluka o prestanku rada donosi se jednoglasno.

## **Član 67.**

U slučaju prestanka rada pčelarskog društva njegova imovina koja ostaje po podmirenju njegovih obaveza, predaje se na upravljanje i čuvanje Savezu pčelarskih društava Tuzlanskog kantona, do ponovnog osnivanja pčelarskog društva.

## **XII – STATUT I DRUGI OPŠTI AKTI DRUŠTVA**

### **Član 68**

Statut i druge opšte akte Društva i njegove izmjene i dopune donosi Skupština javnim glasanjem , većinom glasova prisutnih članova.

Statut i drugi opšti akti donose se na prijedlog Predsjedništva društva.

### **Član 69.**

Inicijativu za izmjene i dopune Statuta i drugih opštih akata mogu podnijeti svi organi Društva i najmanje 1/5 članova društva.

Inicijativa se podnosi Predsjedništvu društva koje je dužno da o tome da svoje mišljenje podnosiocu inicijative u roku od 15 dana.

### **Član 70.**

Izmjene i dopune Statuta i drugih opštih akata koje donosi Skupština društva , vrše se na prijedlog Predsjedništva društva.

Prijedlog izmjene i dopune Statuta i drugih opštih akata utvrđuje Predsjedništvo društva i dostavlja ga Skupštini na razmatranje i usvajanje najkasnije 7 dana prije održavanja sjednice.

### **Član 71.**

Tumačenje Statuta i odredaba drugih opštih akata pčelarskog Društva daje Predsjedništvo društva.

Statut i druge opšte akte Društva potpisuje predsjednik Radnog predsjedništva Skupštine.

Statut i drugi opšti akti društva kao i njihove izmjene i dopune stupaju na snagu danom njihovog donošenja, ako Skupština drugačije ne odredi.

## **VIII - ZAVRŠNE ODREDBE**

### **Član 72.**

Pčelarsko društvo će svoju organizaciju i rad kao i opšte akte društva uskladiti sa odredbama ovog Statuta u roku od 30 dana.

### **Član 73.**

Ovaj Statut stupa na snagu danom donošenja a objavit će se na oglasnoj tabli društva.

### **Član 74.**

Danom stupanja na snagu ovog Statuta prestaje da važi Statut pčelarskog društva „Nektar“ od 12.02.2000.god.

PČELARSKO DRUŠTVO  
„NEKTAR“  
Tuzla, februara 2013.god.

PREDSJEDNIK RADNOG PREDSJEDNIŠTVA  
SKUPŠTINE